

HEADLINES (EVENING)

1. Aizawl leh Silchar inkar kawngpui National Highway kawngchhiaah bungrua a tangkhang nasa a, hemi avang hian nitin eitur supply a vang chho mek.
2. ZPM thupuangtu Pu K. Laltluangkima'n Private Hospital ten MUHCS an zawm zung zung lo chu sorkar damdawi in ten nasa takin hma a sawn phah a ti.
3. Union Home Minister Amit Shah-a chuan Operation Mahadev ah Pahalgam firfiaka chetnaa mawhphurtu firfiak pathum kahhlaum an nih thu Lok Sabha-ah a sawi
4. Union Education Minister Dharmendra Pradhan chuan National Education Policy (NEP) 2020 chu khawvel huap pawha zirna tha neih theihna tur a nih thu a sawi.

<><><>

SUPPLIES

Aizawl leh Silchar inkar kawngpui National Highway kawngchhiaah bungrua a tangkhang nasa a, hemi avang hian nitin eitur supply a vang chho mek. Akashvani corr sawi danin, tun dinhmunah Aizawl ah chuan phai lam atanga lakluh thlai leh eitur hrang hrang a vang chho tan a, bawnghnute thlengin leitur a vang chho mek a ni. Kawnpui leh Sairang inkar kawng siam mek lai hian nimin khaw that lai khan lirthei lian ruak te chu kal hmasak tir an ni a, nizan lamah tuialhthei phur oil tanker leh eirawngbawl na gas phur lirthei te chhuah leh niin, Aizawl-ah phurh thlen mek a ni a, wawiin lamah buhfai leh dawr bungraw phur thenkhatte chhuah an ni bawk a ni.

Mizoram Truck Driver's Association President Pu H Laldingliana chuan Lirthei chhuak zat tak chu hriat theih ni lo mah se, Mizorama mi tur vek te ni lovin ram thenawm, Myanmar leh state thenawm Manipur a kal tur te a ni a ti a, kawng a that tawh loh avangin lirthei a tlan chak thei lova, kawngpui chu siam lai a nih bakah ruah a sur chuan lirthei tan tluang taka kal a harsa a ti a, khua a that pangngai chuan an kal tluan theih a beisei thu a sawi bawk a ni.

Hetihlai hian Lirthei hmanga eizawng pawl 14-in Mizoram chak lakna kawngpui chhia dinhmun an enfiah a, an kal zel dan tur nilaini khian an rel dawn a ni.

Lirthei hmanga eizawng pawl hian kar kalta Thawhlehnia an rorel bawhzuiin, nimin khan Mizoram chak lakna kawngpui chhia siam mek dinhmun hi an enfiah a, Langkaih kawng, Sairang leh Kawnpui inkar leh Kolasib leh Bairabi inkar kawng chhia siama Mizoram Sorkar leh HNIDCL hmalak dan an enfiah a ni. An sawi danin, kawng chhe lai chu khawih ni mah se, an duhthusam erawh a ni lo a, hnathawktu leh khawl an tlem bakah lirthei chevel thununna, traffic management a that loh avangin lirthei tam tak an la tang an ti a ni.

Wawiin khan Agriculture Minister Pu PC Vanlalruata leh Pu Lalmuanpuia Punte, MLA & Adviser to CM te chuan Kawnpui leh Sairang inkar kawng siam mek a hmuna an vil a; hnathawktute chu tha tak leh ngawrh taka hna thawk turin an fuih a, NHIDCL leh PWD te chu lungrual taka thawk tur leh a tul anga intawiawm tha turin an ti bawk.

<><><>

CYMA

Central YMA Executive Committee thukhawmin, tunhnaia state thenawm, Assam-a dan lova Bangladesh atanga awm, hnawh chhuahte chu Mizorama an lo luh loh nan sorkar chu ruahmanna siam thuai a, ILP pek chhuah kawngah fimkhur leh zual turin an ngen.

An thuchhuah tarlan danin, Thawhtan zana Central YMA Executive Committee thukhawm chuan, tunhnaia state thenawm, Assam-a dan lova Bangladesh atanga awm te hnawh chhuah an nih avanga lo inven dan tur a ngaihtuah a. Assam atanga hnawh chhuah te chu thenawm state ah te an luh lohna turin hma an la mek hlawm a. Mizoramah pawh engemaw zat rawn lut ve thei an nih avangin, lo inven dan turah Sawrkarin ruahmanna a la siam lo a nih chuan, siam thuai tur leh ILP pek chhuah kawngah pawh fimkhur leh zual turin an ngen tih an sawi a. State dang atanga dan lo a

lo lut te ven kawngah ramri a awm Sub-Headquarters, Group leh Branch YMA te pawh a tul anga hma la turin an inhriattir bawk tih an sawi a ni.

PC Party pawhin thuchhuah siamin, Assam in an ram a dan lo a awm, Bangladesh atanga lut te hnawt chhuak turin hma a lak mek avangin Meghalaya, Nagaland leh Manipur state sorkar te chuan Assam atanga hnawhchhuah te an state-a an luh lohna tura inbuatsaihna an kalpui bakah an rama dan lova awm te laka hmalak dan tur an ngaihtuah mek bawk a ti a. Hemi avang hian Mizoram sorkar leh mipui pawh inralrin a, hma lak ve thuai a ngai an ti.

Mizoramah hian Bangladesh atanga dan lova lo lut an tam hle tih sawiin PC Party chuan, PC Party kaihhruai sorkarin Bangladesh atanga dan lova rawn lut a hnawhchhuah hnuah khan sawi thama sorkar hmalakna a awm tawh lo an ti a. Tunah hian Assam-ah dan lova awm mi nuai 29 aia tam an awm nia ngaih a ni a. Heng ho hi an hnawtchhuak a nih a, Mizote an rawn chim chuan buaina a thleng thei an ti a ni.

<><><>

ZPM PRESS CONF

ZPM thupuangtu Pu K. Laltluangkima'n Private Hospital ten MUHCS an zawm zung zung lo chu sorkar damdawi in ten nasa takin hma a sawn phah a, hei hi sorkar hmasa ho zawng zawng tih theih loh a ni a ti. He thu hi vawiina Aizawl Press Club a thuthar thehdarhtute an kawmnaah ZPM spokesperson Pu K. Laltluangkima chuan ZPM sorkarin kum 1 leh a chanve chhung chauhvin MUHCS bul a tan thei chu hlawhtlinna nasa tak a ni a ti a. Private Hospital ten MUHCS an zawm zung zung lo chu sorkar damdawi in ten nasa takin hma a sawn phah a, Health Minister leh a Dept ten rei lo te chhungin thawktu sang leh thawktu hniam deuh mi 450 an lak belh a ni a ti a. ZMC&H-ah Cabin khum 30 dah belh a ni a, Medicine ward-ah khum 26 dah belh a ni a, Gynea ward-ah khum 10 dah belhin, ICU-ah khum 13 dah belh a ni a. Lunglei leh Siaha Civil Hospitalah te ICU khum 5 ve ve dah belh a ni bawk a. Sorkar hmasa in Lungleiah RTPCR khawl an bun theih loh laiin, ZPM chuan hmanni lawkah Aizawl Civil Hospital ah MRI khawl an han bun ta ti a, MUHCS chuan nasa takin hmasawнна a thlen a ni a ti.

Hei bakah hian ZPM Spokesperson chuan MLA Dr. K.Beichhua-a'n ABPMJAY rinchanin Mizoram Universal HealthCare Scheme (MUHCS) laimu siam a ni ti-a a sawi chu a dik lo tih sawiin, MUHCS chu ABPMJAY peng pakhat a tih theih a, MUHCS in a huam zau zawk a ti a. MUHCS chuan Mizoram khua leh tui dik tak zawng zawng a huam vek a, hetihlai hian ABPMJAY chuan kum 2011 kum mila mirethei an thlan te leh RSBY 2018 leh NFSA (ration card eng leh pawl nei) chhungkuate te chauh a huam a. An vaiin chhungkua nuai 2, sing 1, sang 9 an ni a, a bak inziah luh theih a ni tawh lo a ti a. ABPMJAY inziak lut, Golden card neitute chuan khatih lai khan private empanelled firm, Aizawlah Damdawi In 2 chauh an nei a, pakhat zawk chu mit lam enna a ni a ti a, hetihlai hian MUHCS hnuaiah chuan Damdawi in tam tak an inziak lut tawh a, an la pung zel dawn bawk a, MUHCS chu a zau zawk a, a tha zawk bawk a, MUHCS chu a laimu zawk niin, ABPMJAY chu a zar peng chauh a ni a ti bawk.

Hei bakah hian ZPM Spokesperson chuan Chief Minister Pu Lalduhoma'n inthlan hma in car ma toah a thu dawn lo tih lo sawi tawh mah se, CM hlui car, kum 15 vela upa tawh siamthat reng ngai a chhawm avangin car thar Toyota leisak a ni a ti a. CM level atan chuan a to lo va, car satliah a ni a ti a. Mizoram chu international ram depa awm a nih avangin Mizoram CM chuan venhimna sang tak, Z+ category security a nei a. A tul a tih chuan bullet proof car pawh hmang thei a ni a. Inthlan dawna "Car man tovah a chuang lovang" a tih hun lai nen khan thil a danglam nasat tawh avangin car man tlawm ber lo la hisappui tlat chu thil intu lo tak niin a sawi bawk.

Tunhnaia MNF in Fisheries Dept pawisa nuaih 100 awmna sorkar an zawh chungchang pawh ZPM Spokesperson chu chhangletin , nuai 100 ni-a an sawi chu nuai 1000 zawk a ni a ti a, kumin April ni 25 khan sanction an hmu a, budget allocation dil thuai a ni a. May ni 27 khan Expenditure sanction dil leh a ni a. Reserve Bank of India in him takin tunah an kawh mek a, a hun taka sanction order tichhuah mai tur a ni tih sawiin, a lo chhuah hun atan a dawngtu tur, beneficiary pawh thlan fel tawh a ni a, an account-ah thunsak zung zung tur a ni a ti.

ZPM Spokesperson chuan tunhnaia sawhthing dah tawih tiha eptuten an sawi chungchang pawh sawifiahin sawhthing hralh tlak leh hralh tlak loh thliarna lama tha lo zual an paih te a nih thu sawiin, thlai thar chu sawngbawl a ngai thin a, loneituten a chhia leh a tha an dah pawlh chuan, lo thenfai a ngai thin a ti a. Zawnha chhangin Pu K. Laltluangkima chuan sawhthing tawih an paih zat chu trip 2 vel a nih thu a sawi a, April thla atanga sawhthing an lei sak loneitu thenkhat zingah support price la dawng lo te chu phaiah engemaw tihfel a la ngaih avangin nghah deuh a la ngai niin a sawi bawk.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni. Naktuk zing dar 7 leh a chanve-ah Chanchinthar puan leh a ni ang.

<><><>

OPERATION SINDOOR

Union Home Minister Amit Shah-a chuan Operation Mahadev ah Pahalgam firfiaka chetnaa mawhphurtu firfiak pathum kahhlaum an nih thu Lok Sabha-ah a sawi. Operation Sindoor chungchang sawihonaah he thu hi sawiin Pu Shaha chuan firfiak kahhlum te hi -Suleman Shah, Jibran leh Hamza Afghani te an nih thu a sawi a. Indian Army, CRPF leh Jammu and Kahsmir Police ten firfiak pathumte hi an kahhlum thu a sawi a. An kut atangin rifle pathum man a ni a ti bawk.

Pu Shaha chuan Prime Minister Narendra Modian firfiakte lakah rang taka a chet nghal thu sawiin Operation Sindoor pawh phalna a pe nghal a ti a. Pahalgam firfiaka chetnaa inhnawihthe chu ramchhung an chhuahsan loh nana venhimna khauh zawka kalpui turin thurawn pek an ni a ti a. Firfiakte kahhlum an ni leh an hmuhnhma te kahchhiat a nih chungchangah sipaite fakawm a tih thu a sawi a ni. Vawiin khan Rajya Sabha ah pawh Operation Sindoor hi sawiho a ni.

<><><>

NEP

Union Education Minister Dharmendra Pradhan chuan National Education Policy (NEP) 2020 chu khawvel huap pawha zirna tha neih theihna tur a nih thu a sawi. Vawiina New Delhi-a NEP 2020 kum 5 tlin puala Akhil Bharatiya Shiksha Samagam 2025 ah he thu hi sawiin Pu Pradhan-a chuan NEP chu ram changkang ni tura kawng zawh mek Vikshit Bharat 2047 ah a kalkawng pawimawh tak a ni chho mek a ti a. NEP chuan ramchhung zirna kalphungah harhtharna a rawn thlen tih sawiin sawrkarin hlawhtling takin NEP chu classroom, campus leh community ah a hruailut a ni a ti.

NEP chungchanga kan correspondent zawnha chhangin PUC-a Assitang Professor Dr. Daniel Lalawmpuia chuan NEP-a hian mahni tualto tawnga zirna kalpui a ngai pawimawh tih a sawi a. Pawl hniam lamah Zirlaiten an zirlai chiang zawkaan thiam theih nan three language formula kalpui tum anih thu a sawi a ni.

<><><>